



KEMENTERIAN EKONOMI
JABATAN PERANGKAAAN MALAYSIA

KENYATAAN MEDIA

LAPORAN SOSIOEKONOMI NEGERI 2022

Petunjuk utama sosioekonomi negeri-negeri 2022 berkembang lebih baik dipacu pertumbuhan perbelanjaan pelancongan domestik, 248 peratus kepada RM64.1 bilion

PUTRAJAYA, 7 OGOS 2023 – Jabatan Perangkaan Malaysia (DOSM) pada hari ini menerbitkan **Laporan Sosioekonomi Negeri 2022** yang memperihalkan naratif sosioekonomi 13 buah negeri dan dua Wilayah Persekutuan. Laporan ini mengintegrasikan statistik ekonomi dan sosial terpilih untuk menghasilkan laporan prestasi ekonomi negeri yang inklusif. Penerbitan edisi ke-6 ini turut memuatkan statistik pendapatan dan perbelanjaan isi rumah yang merupakan proksi kepada pengukuran status sosioekonomi masyarakat dan negara.

Ketua Perangkawan Malaysia, Dato' Sri Dr. Mohd Uzir Mahidin berkata, "Pembukaan semula sempadan antarabangsa negara dan peralihan Malaysia ke fasa endemik pada 1 April 2022 telah memberi impak positif terhadap persekitaran sosioekonomi negara. Ini dicerminkan melalui pertumbuhan Keluaran Dalam Negeri Kasar atau KDNK negara yang melonjak kepada 8.7 peratus berbanding 3.3 peratus pada tahun 2021, menjadikannya prestasi terbaik selepas tahun 2000. Pembukaan semua aktiviti ekonomi khususnya industri berkait pelancongan turut mendorong pengukuhan ekonomi negara. Kebenaran rentas negeri serta pelaksanaan pelbagai inisiatif oleh Kerajaan bagi memulih industri pelancongan yang terjejas sejak dua tahun lalu telah menggalakkan pelancongan domestik negara. Ia dapat dilihat melalui prestasi pelancongan domestik yang memulih secara luar biasa dengan mencatatkan jumlah perbelanjaan sebanyak RM64.1 bilion berbanding RM18.4 bilion pada tahun 2021, iaitu peningkatan sebanyak 248.1 peratus. Bilangan pelawat domestik turut melonjak 160.1 peratus kepada 171.6 juta pelawat berbanding 66.0 juta pelawat pada tahun sebelumnya. Selangor menerima paling ramai

pelawat domestik iaitu 22.0 juta orang, diikuti W.P. Kuala Lumpur dan Sarawak masing-masing menerima 16.9 juta dan 15.5 juta pelawat. Manakala bagi pelancong domestik, ia meningkat 337.1 peratus kepada 65.1 juta orang berbanding 14.9 juta orang pada tahun 2021. Pahang mencatatkan peningkatan pelancong domestik tertinggi iaitu sebanyak 511.8 peratus dengan ketibaan pelancong seramai 7.8 juta orang berbanding tahun sebelum iaitu 1.3 juta orang. Ini sekali gus melonjakkan pertumbuhan aktiviti kesenian, hiburan dan perkhidmatan persendirian lain negeri Pahang kepada 96.7 peratus, seterusnya menyumbang kepada pertumbuhan sektor Perkhidmatannya pada kadar 16.8 peratus, mengatasi pertumbuhan di negeri-negeri lain. Peningkatan aktiviti pelancongan ini telah menyumbang kepada peningkatan prestasi subsektor berkait pelancongan seperti Perdagangan borong & runcit, makanan & minuman dan penginapan yang merekodkan pertumbuhan dua digit di semua negeri.”

Persekitaran ekonomi negara yang memberangsangkan juga telah meningkatkan keyakinan pelabur untuk melabur di negara ini. Menurut Lembaga Pembangunan Pelaburan Malaysia (MIDA), negara merekodkan pelaburan yang diluluskan bernilai RM264.6 bilion pada tahun 2022. Pelaburan asing kekal sebagai penyumbang utama, menyumbang 61.7 peratus atau RM163.3 bilion. Sementara itu, pelaburan domestik menyumbang 38.3 peratus atau RM101.3 bilion. Lima negeri merekodkan aktiviti pelaburan yang tertinggi, didahului oleh Johor dengan nilai pelaburan diluluskan sebanyak RM70.6 bilion. Ini diikuti oleh Selangor (RM60.1 bilion), Sarawak (RM28.2 bilion), W.P. Kuala Lumpur (RM25 bilion) dan Pulau Pinang (RM16.3 bilion). Sehubungan itu, sebanyak 4,517 projek dijangka akan dilaksanakan yang bakal mewujudkan 140,440 peluang pekerjaan baharu untuk penduduk Malaysia.

Ekosistem ekonomi negara yang semakin pulih turut diperlihatkan melalui prestasi ekonomi yang berkembang lebih baik di semua negeri berbanding tahun sebelumnya. Empat negeri menunjukkan prestasi memberangsangkan dengan pertumbuhan KDNK melebihi nasional iaitu Pulau Pinang (13.1%), Selangor (11.9%), Pahang (10.8%) dan W.P. Kuala Lumpur (9.2%). Dari perspektif prestasi KDNK per kapita, semua negeri mencatatkan peningkatan berbanding tahun 2021. Lima negeri merekodkan nilai KDNK per kapita melebihi paras nasional (RM 54,785) iaitu W.P. Kuala Lumpur (RM126,423), W.P. Labuan (RM85,522), Sarawak (RM80,772), Pulau Pinang (RM69,591) dan Selangor (RM59,804).

Pertumbuhan ekonomi yang memberangsangkan juga dapat dilihat dengan peningkatan jumlah dagangan kepada RM2.8 trilion (2021: RM2.2 trilion) dengan nilai eksport dan import masing-masing berjumlah RM1.6 trilion dan RM1.3 trilion. Eksport meningkat 25.0 peratus manakala import meningkat lebih tinggi, iaitu 31.3 peratus pada tempoh sama. Pengukuhan nilai eksport ini dipacu oleh beberapa komoditi utama, antaranya litar elektronik bersepadu (32.8%) serta barangan elektrik dan elektronik yang lain (13.2%). Ini mendorong prestasi eksport yang baik di Pulau Pinang (30.3%), Selangor (8.8%) dan Kedah (36.1%). Selain itu, eksport keluaran petroleum bertapis turut meningkat 76.0 peratus pada tempoh sama. Ini mendorong kenaikan eksport bagi Johor, Sarawak dan W.P. Kuala Lumpur dengan pertumbuhan masing-masing sebanyak 35.2 peratus, 52.7 peratus dan 4.5 peratus pada tahun 2022.

Prestasi ekonomi yang mampan turut mendorong peningkatan taraf hidup rakyat. Berdasarkan dapatan Survei Pendapatan Isi Rumah Malaysia, 2022 yang diterbitkan oleh DOSM, pendapatan isi rumah penengah kasar bulanan meningkat daripada RM5,873 pada tahun 2019 kepada RM6,338 pada tahun 2022. Pendapatan isi rumah penengah tertinggi direkodkan oleh W.P. Kuala Lumpur iaitu sebanyak RM10,234. Ia seterusnya diikuti oleh W.P. Putrajaya (RM10,056) dan Selangor (RM9,983). Selangor mencatatkan purata pertumbuhan pendapatan penengah tertinggi iaitu 6.5 peratus setahun antara tempoh 2019 dan 2022. Peningkatan pendapatan turut mempengaruhi corak perbelanjaan isi rumah. Survei Perbelanjaan Isi Rumah, Malaysia, 2022 melaporkan bahawa secara purata, isi rumah di Malaysia berbelanja RM5,150 sebulan pada 2022 (2019: RM4,609) iaitu meningkat 3.7 peratus setahun antara tempoh 2019 hingga 2022. Perbelanjaan penggunaan isi rumah bulanan purata tertinggi direkodkan di W.P. Putrajaya iaitu RM8,897. Lima negeri lain turut mencatatkan perbelanjaan penggunaan isi rumah melebihi purata nasional (RM5,150) iaitu W.P. Kuala Lumpur (RM7,823), Selangor (RM6,770), Melaka (RM5,707), Johor (RM5,342) dan Pulau Pinang (RM5,322).

Dato' Sri Dr. Mohd Uzir Mahidin juga menjelaskan bahawa, "Peningkatan pendapatan isi rumah mendorong kepada peningkatan kuasa beli pengguna yang seterusnya meningkatkan permintaan terhadap barangan dan perkhidmatan. Ini merupakan salah satu faktor yang menyumbang kepada peningkatan dalam harga pengguna. Ia ditunjukkan oleh kadar inflasi di Malaysia yang meningkat 3.3 peratus berbanding

2.5 peratus pada tahun 2021. Ia didorong oleh peningkatan dalam perbelanjaan berkait dengan kumpulan Makanan & Minuman, 5.8 peratus; Restoran & Hotel, 5.0 peratus; Pengangkutan, 4.7 peratus dan Hiasan, Perkakasan & Penyelenggaraan Isi Rumah, 3.5 peratus. Peningkatan kadar inflasi ditunjukkan oleh semua negeri dengan tiga negeri mencatatkan inflasi melebihi paras nasional 3.3 peratus.” Peningkatan tertinggi dicatatkan oleh W.P. Putrajaya (7.3%), Selangor (4.2%) dan Johor (3.4%). Walau bagaimanapun, negeri-negeri lain masih merekodkan paras inflasi di bawah purata nasional dengan W.P. Labuan mencatatkan inflasi terendah iaitu 2.4 peratus.

Statistik kependudukan merupakan elemen penting dalam merencanakan pembangunan sesebuah negara. Penduduk Malaysia pada tahun 2022 dianggarkan seramai 32.7 juta orang, meningkat sebanyak 0.4 peratus berbanding tahun 2021. Lapan negeri merekodkan pertumbuhan penduduk melebihi nasional iaitu W.P. Putrajaya (1.5%), Terengganu (1.4%), Kelantan (1.0%), W.P. Labuan (0.9%), Pahang (0.8%), Perlis (0.7%), Selangor (0.5%) dan Kedah (0.5%). Pada tempoh sama, lima negeri menyumbang hampir 60 peratus kepada jumlah penduduk Malaysia iaitu Selangor (7.1 juta orang), Johor (4.0 juta orang), Sabah (3.4 juta orang), Perak (2.51 juta orang) dan Sarawak (2.47 juta orang).

Senario ekonomi yang baik di semua negeri telah membuka banyak peluang pekerjaan baharu yang dicerminkan oleh pasaran buruh yang semakin mengukuh. Kadar Penyertaan Tenaga Buruh (KPTB) meningkat 0.7 mata peratus kepada 69.3 peratus pada 2022 berbanding 68.6 peratus pada tahun 2021. Seiring dengan itu, KPTB bagi semua negeri mencatatkan peningkatan berbanding tahun sebelumnya. Enam negeri merekodkan KPTB melebihi nasional, 69.3 peratus iaitu Selangor (76.9%), W.P. Putrajaya (75.7%), W.P. Kuala Lumpur (72.4%), Johor (70.9%), Sabah (70.9%) dan Pulau Pinang (70.3%). Kadar Pengangguran juga semakin memulih dengan mencatatkan 3.9 peratus berbanding 4.6 peratus pada tahun sebelum. Bagi kadar pengangguran mengikut negeri, semua negeri menunjukkan penurunan. Hampir semua negeri mencatatkan kadar pengangguran di bawah paras nasional kecuali Sabah, W.P. Labuan dan Perak, masing-masing 7.5 peratus, 7.2 peratus dan 4.6 peratus. Manakala kadar pengangguran terendah direkodkan oleh W.P. Putrajaya (1.0%).

Dato' Sri Dr. Mohd Uzir Mahidin seterusnya merumuskan, "Berdasarkan rangkuman naratif sosioekonomi negeri, pelbagai langkah proaktif oleh Kerajaan telah mempercepat transisi ekonomi negara daripada fasa pemulihan kepada pengukuhan. Pemulihan ekonomi bukan sahaja ditranslasikan melalui pertumbuhan ekonomi yang semakin mengukuh, ia juga ditunjukkan oleh peningkatan taraf hidup dan kesejahteraan sosial masyarakat."

DOSM sedang menjalankan Banci Ekonomi pada tahun 2023. DOSM amat menghargai kerjasama daripada responden dalam memberikan maklumat kepada DOSM serta menjayakan banci ini. Sila layari www.dosm.gov.my untuk maklumat lanjut.

DOSM telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data. OpenDOSM NextGen ialah platform perkongsian data sumber terbuka dan boleh diakses melalui portal <https://open.dosm.gov.my>.

Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah "*Connecting the World with Data We Can Trust*".

Dikeluarkan oleh:


**PEJABAT KETUA PERANGKAWAN
JABATAN PERANGKAAN MALAYSIA
7 OGOS 2023**

Carta 1: Pertumbuhan ekonomi mengikut negeri dan aktiviti ekonomi, 2022


Negeri	 Pertanian	 Perombongan & pengkuarian	 Pembuatan	 Pembinaan	 Perkhidmatan	 KDNK 2022	 KDNK 2021
Pulau Pinang	3.4	7.9	15.9	7.9	11.3	13.1	6.9
Selangor	-1.6	9.7	9.0	4.1	13.6	11.9	5.3
Pahang	4.9	9.7	5.8	-1.0	16.8	10.8	0.9
WPKL*	4.1	7.7	5.3	2.0	10.7	9.2	1.0
MALAYSIA	0.1	2.6	8.1	5.0	10.9	8.7	3.3
Melaka	-0.7	7.6	6.8	5.0	12.2	8.6	2.1
Johor	1.9	7.5	5.5	15.9	10.8	8.2	2.5
Kedah	-0.9	7.8	8.1	18.3	8.1	7.2	3.2
Sarawak	0.7	5.7	5.6	4.0	9.6	6.5	3.1
Negeri Sembilan	-0.6	7.9	8.0	5.7	7.6	6.4	3.1
Terengganu	-4.7	8.1	8.2	3.4	6.0	5.9	3.7
Perlis	2.2	7.2	4.5	1.1	5.7	5.7	1.4
Perak	-3.9	8.9	1.0	6.1	7.2	4.3	3.6
Kelantan	-4.9	8.4	3.1	19.7	6.8	4.3	2.4
W.P. Labuan	3.6	-	1.7	3.2	4.6	4.0	0.5
Sabah	-0.2	-1.3	-2.5	6.2	8.6	3.7	1.5
SUPRA	-	2.0	-	-	-	2.0	2.9

* Termasuk W.P. Putrajaya


Carta 2: Indeks Harga Pengguna mengikut negeri, 2021-2022




Carta 3: Nilai eksport barangan mengikut negeri, 2021-2022



Carta 4: Kadar penyertaan tenaga buruh mengikut negeri, 2021-2022



Carta 5: Kadar pengangguran mengikut negeri, 2021-2022



Carta 6: Pendapatan isi rumah kasar bulanan penengah mengikut negeri, 2022

